

## TEGUH BERSAMA AHLI SUNNAH WAL JAMAAH

10 Zulkaedah 1443H /10 Jun 2022M

أَحْمَدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ  
أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ.

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ  
وَرَسُولُهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.  
أَمَّا بَعْدُ،

فَيَا عِبَادَ اللَّهِ، اتَّقُوا اللَّهَ وَأُوصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita bersama-sama meningkatkan ketakwaan kepada Allah Subhanahu wa-Ta'ala dengan melaksanakan segala perintah dan meninggalkan segala larangan-Nya. Mudah-mudahan kita diberkati Allah Subhanahu wa-Ta'ala di dunia dan akhirat.

### Sidang Jumaat yang dirahmati Allah Subhanahu wa-Ta'ala

Para Nabi diutuskan untuk membawa manusia supaya tunduk menyembah Allah dan menjauhi taghut. Firman Allah Subhanahu wa Taala dalam Surah al-Nahl ayat 36:

أَعُوذُ بِاللَّهِ مِنَ الشَّيْطَانِ الرَّجِيمِ

وَلَقَدْ بَعَثْنَا فِي كُلِّ أُمَّةٍ رَسُولًا أَنِ اعْبُدُوا اللَّهَ وَاجْتَنِبُوا  
الطَّاغُوتَ فَمِنْهُمْ مَن هَدَى اللَّهُ وَمِنْهُمْ مَن حَقَّتْ عَلَيْهِ الضَّلَالَةُ فَسِيرُوا  
فِي الْأَرْضِ فَانظُرُوا كَيْفَ كَانَ عَاقِبَةُ الْمُكذِّبِينَ ﴿٣٦﴾

**Yang bermaksud:** “Dan sesungguhnya Kami telah mengutus dalam kalangan tiap-tiap umat seorang Rasul (dengan memerintahkannya menyeru mereka): "Hendaklah kamu menyembah Allah dan jauhilah Taghut". Maka di antara mereka (yang menerima seruan Rasul itu), ada yang diberi hidayah petunjuk oleh Allah dan ada pula yang berhak ditimpa kesesatan. Oleh itu mengembaralah kamu di bumi, kemudian lihatlah bagaimana buruknya kesudahan umat-umat yang mendustakan rasul-rasulnya.”

Namun begitu, antara cabaran yang dialami dalam kalangan orang yang beriman ialah penyelewengan akidah yang berpunca daripada ketaasuban, kesesatan dan kejahilan. Ini akhirnya membawa kepada perpecahan umat. Sabda Nabi Muhammad Sallallahu Alaihi wa Sallam seperti dalam riwayat Imam Tirmizi:

وَإِنَّ بَنِي إِسْرَائِيلَ تَفَرَّقَتْ عَلَى ثِنْتَيْنِ وَسَبْعِينَ مِلَّةً وَتَفَتَّرِقُ أُمَّتِي عَلَى ثَلَاثٍ  
وَسَبْعِينَ مِلَّةً كُلُّهُمْ فِي النَّارِ إِلَّا مِلَّةً وَاحِدَةً قَالُوا وَمَنْ هِيَ يَا رَسُولَ اللَّهِ قَالَ مَا  
أَنَا عَلَيْهِ وَأَصْحَابِي

**Yang bermaksud:** “*Sesungguhnya Bani Israel telah berpecah kepada 72 golongan, dan umatku kepada 73 golongan. Semua akan masuk neraka kecuali satu. Mereka pun bertanya, siapa yang satu ya Rasulullah? Baginda menjawab, Sesiapa yang berada pada apa yang aku dan para sahabatku jalani kehidupan.*”

Sejak kewafatan Rasulullah Sallallahu Alaihi Wasallam, perpecahan umat telah berlaku dengan kemunculan nabi palsu, puak yang enggan membayar zakat, khawarij, dan kemunculan syiah serta muktazilah. Ada yang muncul dengan sebab kepentingan peribadi, dan ada pula yang muncul akibat perpecahan politik yang akhirnya mengundang kepada ketaasuban yang menyesatkan.

Dengan sebab itulah, amat penting kita mengikut pedoman Nabi, supaya melazimi manhaj kehidupan baginda dan para sahabat. Dalam riwayat lain, Rasulullah Sallallahu Alaihi Wasallam turut berpesan agar umat baginda mengikut *al-Sawad al-A'zam* dan jemaah, yang bermaksud kumpulan yang ramai,

berteraskan kepada al-Quran dan al-Sunnah. Inilah manhaj yang dikenali sebagai Ahli Sunnah wal Jamaah.

### **Sidang Jumaat yang dirahmati Allah Subhanahu wa-Ta'ala**

Akidah Ahli Sunnah wal Jamaah aliran Asha'irah dan Maturidiyyah menjadi pegangan umat Islam di Negeri Pahang. Ini berdasarkan,

Pertama: Berpegang kepada Tauhid sifat 20 yang diasaskan oleh Imam Abu Hasan al-Ashaari dan Imam Abu Mansur al-Maturidi yang hidup dalam 3 kurun terawal yang dinyatakan oleh Nabi Muhammad Sallallahu Alaihi wa Sallam sebagai sebaik-baik kurun.

Kedua : Mengamalkan salah satu daripada mazhab fikah yang muktabar khususnya Negeri Pahang yang mengutamakan mazhab Shafie.

Ketiga : Menerima ajaran tasawuf dan tarekat yang muktabar dan tidak bercanggah dengan syariat.

Sebilangan besar ulamak mengikuti aliran Asha'irah. Antara mereka ialah Imam al-Juwaini, Imam al-Ghazali, Fakhruddin al-Razi, al-Subki, al-Sanusi dan ramai lagi selain mereka.

Begitu juga, Sultan Muhammad al-Fateh, yang berjaya membuka Kota Constantinople yang kini dikenali sebagai Istanbul adalah pengamal sifat 20 aliran

Asha'irah. Inilah pemimpin yang telah dinyatakan dalam hadis Rasulullah Sallallahu Alaihi Wasallam sebagai sebaik-baik pemimpin dan tenteranya.

Dalam Kitab al-Tabaqat, Imam al-Subki menyatakan bahawa Abu Hasan al-Ash'ari tidak mencipta pendapat baru dalam pegangannya. Inilah yang dimaksudkan oleh Rasulullah Sallallahu Alaihi Wasallam dalam hadisnya mengenai Ahli Sunnah wal Jamaah.

Kesimpulannya, marilah kita bersama-sama berpegang teguh dengan akidah ini dengan mempelajari tauhid Sifat 20 berteraskan aliran Asha'irah dan Maturidiyyah, jangan sekali-kali mengikuti selain daripadanya seperti tauhid tiga serangkai iaitu rububiyah, uluhiyah dan asma' wa sifat serta wahabi, syiah dan ajaran sesat.

أَعُوذُ بِاللَّهِ مِنَ الشَّيْطَانِ الرَّجِيمِ  
الَّذِينَ يَسْتَمِعُونَ الْقَوْلَ فَيَتَّبِعُونَ أَحْسَنَهُ ۗ وَأُولَٰئِكَ الَّذِينَ هَدَى اللَّهُ <sup>ص</sup>  
وَأُولَٰئِكَ هُمُ الْأَوْلَىٰ ۗ

**Yang bermaksud** :“*Yang berusaha mendengar perkataan-perkataan yang sampai kepadanya, lalu mereka memilih dan menurut dengan sebaik-baiknya (daripada segi hukum agama) : mereka itulah orang yang diberi hidayah oleh Allah dan mereka itulah orang yang berakal sempurna.*”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ. وَنَفَعَنِي وَإِيَّاكُمْ بِمَا فِيهِ مِنَ الْآيَاتِ  
وَالذِّكْرِ الْحَكِيمِ. وَتَقَبَّلَ اللَّهُ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ  
قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ  
وَالْمُؤْمِنِينَ وَالْمُؤْمِنَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ